

Parter stgazis audiovisuals cun la communitad

Radiotevisiun Svizra Rumantscha

DA GION NUTEGN STGIER / ANR

■ **Ier ha Radiotevisiun Svizra Rumantscha (RTR) preschentà ses pli nov project. Immediatamain èsi pussaivel d'avair access tar in bel dumber films, videos e fotos che derivan da l'archiv dad RTR, da la Biblioteca chantunala e da personas privatas. Pussaivel da far quai èsi sin la pagina: «nossa istorgia.ch».** En collavuraziun cun la fundaziun «Fonsart» preschenta Radiotevisiun Svizra Rumantscha l'emprima plattform digitala, istorica e participativa da la Svizra rumantscha e dal Grischun. Sin la pagina d'internet «nossa istorgia.ch» han personas privatas ed er instituziuns ed organizaziuns culturalas ed autras la pussaivladad da metter online lur fotografias, videos, films u er dossiers e parter quels stgazis cun la communitad. Formular ins sà quai er auter cun dir: maletgs da tuts per tuts.

RTR ha in archiv cun 60 000 documents en tun e maletg

Dapi intgins onns archivescha e digitalisescha RTR films e videos ed en il fratep haja RTR en ses archiv var 60 000 documents audiovisuals en tun e maletg, ha ditg *Ladina Heimgartner*, la directura dal manaschi. La nova plattform duai er esser in med per scolas, medias, uniuns ed instituziuns che vulan tematisar istorias culturalas, localas e regiunalas. En ina moda u l'aurta saja la pagina digitala «nossa istorgia.ch» ina rait sociala. Da sa fatschentar cun quella pli nova purschida dad RTR saja bain er ina chausa dal cor, ha punctuà Heimgartner.

Trais personas han collavurà

Ella ha er ditg: «Cun sustegn da nosa chasa-mamma, la SRG SSR, avain nus pudì realisar quest project che pussibilitescha ad RTR da render accessibel a la publicitad anc meglier ses archiv audiovisual. Da cuminanza cun noss public vulain nus scriver l'istorgia da nosa regiun.» Gronds merits per la realisaziun da



Sa legran da la nova purschida dad RTR: Flurina Huonder, Ladina Heimgartner, Alexi Monn ed Erwin Ardüser dad RTR (da san.).

FOTO G. N. STGIER

la pagina «nossa istorgia.ch» han cunzunt *Flurina Huonder*, la documentalista tar RTR, e lura en spezial *Erwin Ardüser*, el ch'è in expert sch'i va per la cultura locala e regiunala er grazia a ses buns contacts en l'entir intschess rumantsch. Collavurà per quel project ha er *Alexi Monn*, er el ina persuna cun blera experientscha.

Contribuir in pau al success da la pagina d'internet

La finamira da la nova plattform è da crear ina cuminanza d'utilisaders che

documentescha e reconstruescha moments istorics da la Svizra rumantscha e dal Grischun. Ils utilisaders da «nossa istorgia.ch» sa registreschan sin la plattform e deponan fotografias, films, videos, registraziuns da tun digitalisadas e testimonianzas en scrit ubain autras funtaunas actualas ed istoricas. In e scadin po crear gratuitamain in account e contribuir al success dal project: cun interagir e cun commentar documents, cun publictar agens documents e cun crear dossiers.

Per la realisaziun da la nova plattform digitala ha RTR gi ferm sustegn dal chantun, cunzunt dal departament da cultura e sia manadra *Barbara Gabrieli*. Ultra da quai ha RTR profità da las experientschas ch'il radio e la televisiun RTS, l'organizaziun da la SRG SSR en la Svizra franzosa, ha fatg cun avoir gia dapi il 2009 quella plattform. *Françoise Clément*, la represchentanta dad RTS, ha ditg che la plattform «nossa istorgia.ch» saja insaco bain er ina passiuin, almain en la Romandie saja quai uschia.